

尺牘

與范蜀公三帖

蘇東坡

日望旌旗之至不敢復上問不謂高懷超然不屑世故堅卧莫致有識悵惘然孤風凜然定以下激頽靡雖非赫赫可拍之功其於二聖忠厚之治所補多矣比日復茲寒凝台候何如未由瞻奉伏冀万万為國自重謹奉啟不宣

碌碌无補久竊非據又舍弟繼進皆以踈愚處必爭之地公議未厭豈可久安非遠當乞一郡以自效或得過謁少聞誨語又幸也始者竊意丈丈絕意軒冕然猶當勉強到闕一見嗣聖今乃確然如此甚乖素望然士大夫甚高此幸也冗中不尽區區

伏承歸政得請恩礼優異伏惟慶慰公孤風亮節久信天下而有識今日尤復歸心勉強暫起以慰二聖之望幡然復退以安无窮之福出處之間雍容自得真可以為後世法矣官守所縻不獲躬

詣謹奉手啓布區三万一不宣

與司馬温公三帖

蘇東坡

春末景仁丈自洛還伏辱賜教副以超然雄篇喜抃累日尋以出
京无暇比到官隨分紛乱又稽裁謝悚怍无已即日不審台候何
似公強顏苟祿忝竊中所愧於左右者多矣未涯瞻奉惟冀爲國
自重謹奉啓上問不宣

超然之作不惟不肖託附以爲寵遂使東方陋州以爲不朽之美
事然所以獎與則過矣久不見公新文忽領獨樂園記誦味不已
輒不揆作一詩聊發笑耳彭城佳山水魚蟹爭訟聞然盜賊衰
少聊可藏拙但朋遊闊遠舍弟非久赴任益岑寂矣

謫居窮僻如在井底杳不聞京洛之耗不審適日寢食何如公以
愚暗獲罪咎自己招无足言者但波及左右爲恨殊深雖高風偉
度非細故所能塵垢然在公思之不翅芒背耳寓居去江干无十
步風濤煙雨曉夕百變江南諸山在几席下此幸未始有也雖有
窘乏憂亦布褐藜藿而已瞻晤无期臨紙惘然

與王荆公

蘇東坡

公遊門下久矣然未嘗得如此行朝夕繼見聞所未聞慰幸之極
已別悵仰不可言經宿伏惟台候康勝不敢重上謁伏冀順時爲
國自重不宣

與王荆公

司馬温公

公以薄眷之久誠不忍視天下之論訥訥是敢輒獻言于左右意
謂縱未弃弛其取諾辱必矣豈謂介甫乃更賜之誨筆存慰温厚
雖未肯信用其言亦不辱而施之足見君子寬大之德過人遠甚
也公雖未甚曉孟子至於義命之說甚爲明白介甫或更有正解
亦恐似用心太過也作法於涼其弊猶貪作法於貪弊將如之何
也今四方豐稔縣官復散錢與之安有父母不相見兄弟妻子離
散之事公所言者乃在數年之後常平法既壞內藏庫又空家二
於常賦之外更增息錢役錢又言利者以聚斂得好官後來者必

竟生新意以取民之脂膏日甚一日民產既竭小值水旱則公所
言者介甫且親見之知其不為過論也當是之時願毋罪歲而已
感發而言重有喋喋負罪益深不宣

與王荆公

歐陽 永叔

相別忽焉遂見新歲中間嘗一得奉書其如忽遽不尽鄙懷猶以
為恨雖然遂使不忽遽區區之懷亦不能盡也賢弟來得書曩動
止春寒奉太夫人万福喜慰无限賢者不能留之朝衰病者不得
放去皆失其分歸咎於何自新春來自益昏耳益不聰大懼難久
筆硯平生所懷有所未畢恐遂為庸人以死耳其他細故不足道
惟奉親自愛

與文潞公

韓魏公 稚圭

公昨於郡圃治發亭為閱古堂取古之賢守良將悉繪于壁間彥
國諸公往往有詩然不得公一篇以先之恐未足傳之永久敢告
留數刻之暇特垂寵賜不獨榮耀窮塞實終身之幸也明公方
總大計事務日繁不當有此煩聽蓋恃眷在自必寬罪戾也

與夏公二帖

文潞公

忝位妨賢懇求外補天慈從欲俾守西都叨幸益深啟處增愧豈
期存念遠辱慶函銘荷之深敷陳奚既兼承鎮撫多暇鈞履復和
寧尤用欣慰未涯披對弥極詹依惟冀保修行須大任傾系之切
臨紙坐馳

朝廷倚舊德重望以長城方面之寄詔下之日中外相慶未皇修
問先辱貽書感愧无量承將及都下入覲非晚想即蒲座遂應寵榮
尚遠披晤伏冀示養

與夏公二帖

賈 子明

向者略披英表企渴之至且暮不忘公此者獲解近司出守輔郡
併陪寵數但切愧懷遠辱誨言更深銘荷秋涼冀為國自重早還
廊廟天下之幸况惟衰拙永托芘休

昨者思息處人至領所賦緘牘仰企意愛之厚切惟改鎮巨藩道

涂夷闊動止休裕甚慰彥望之誠公兩守北都懇求僻郡乃有召
命還冠樞幄衰拙辭遜不獲勉力待罪夙荷知獎遂容忝冒夏暑
伏冀為國自重

與晏公

范文正公仲淹

公再拜上覆叅政尚書共惟台候起居万福公十七日至京諸公
並未敢請見蒙賜誨言敢不佩戴彥仰恩館伏惟為國自重卑情
祝願之至謹奉手狀起居

與呂吉甫叅政三帖

王介甫

與公同心以至異意皆緣國事豈有他哉同朝紛二公獨助我則
我何憾於公人或言公吾无與焉則公何憾於我趣時便事吾不
知其說焉考實論情公亦且照於此開懷周悉覽之悵然昔之在
我誠无細故之疑今之在公尚何舊惡足念然公以壯烈方進為
於聖世而茫然衰病時將待及於山林趣舍異事則煦以濕不若
相忘之愈也想趣詔在朝夕惟良食自愛不宣

承恩幅勤勤為禮過當非敢望於故人也不敢眠此以為報礼想
蒙恕察承已祥除伏惟尚有餘慕知有所諭者恨未見之雖賴恩
愛得優游疾備弃日茫然未獲奉并惟冀愛重

承誨示勤二豈勝感愧聞有太原新除不知果成行否想遂治裝
而西也示及法界觀文字輒留玩讀研究義味也觀身與世如泡
夢幻若不以此洗心而沈於諸妄不亦悲乎相見无期惟割磨世
習共進此道則雖隔闊常若交臂雖衰疲曹耗敢不勉此猶冀未
死間或得晤語以究所懷未耳良食自愛令弟想各安裕必同西
上也惠及海物愧荷不忘村落无物可以將意粟二菴馳獻公今
年雖无病年弥高矣衰亦滋極稍自勞動便不支持向著字說今
已成就恨未得致左右觀古人多寓妙道於此所惜許慎所傳止
此又有偽謬故於思索難及耳

與呂吉甫叅政二帖

沈文通

金山得所寄詩不及答但有愧服閣中愛子並想全安望亭之行

在早晚耶因風寄聲為慰幸甚幸甚糜角公在抗越三年海上
遍訪不能得乃知南中山深淺偏不容此大物聞荆湖最多已作
書澧州求矣到當奉寄京師有所要一二示及无外无外
示及新篇君詩固佳矣然此篇又超逾前後乃用意之至者也欽
歎无量本欲作一篇看此次第更如何下手也忽忽猶有可恨者
書果佳耳呵二示歌圖領之至樂寂室二詩賦成即往但未讀者
必先二記則詩其可復取耶

與范文正公

曾丞相公亮

拜遠風儀三換歲律而久不上記蓋无因而前惟乃心馳仰之勤
耳中春氣和伏惟鎮抚多間尊候褷福數年均佚應道氣增茂上
方注意以待康濟无願為時自愛不宣

與韓公二帖

文潞公

睽閔台儀日深翹想才薄任重鮮暇寄誠向審被命中宸剖符外
鎮承消剛日已諧視事屢欲修慶幅以伸區區之意因循多故久
之未皇敢恃高明有以垂亮比辰伏惟偃藩之暇鈞履康勝炎歊
方熾正遠話言敢冀保調行歸柄用懇悃之素良積下懷
河水未清疆場多事朝廷慎東實賴長城歲月之間諒煩經畫夷
夏畏愛即期端密雅歌緩帶沛然餘間復歸廟朝康福天下茲所
望於公也非佞非佞

與田樞密

陳丞相執中

此者同事恭壇獲終盛禮衰朽之抱慶抃不殊方切詠思遽辱緘
翰獎飾過厚塊杓增深兼聆聃用頓康尤多慰愜矣惟希精加服
餌用副棲倚之懇是祝是祝

與孫元規大資貳帖

富公 彛國

自前年一附艾書後以多故更闕上狀切承下車以來政治優閑
人情安服亦惟抚鎮多暇起居康適向於道中特辱真誨五年疑
結之恨差已消釋其為慰浣非紙墨可及也東方賴公藩屏朝廷
无慮矣更希若時愛重以俟迅召也欽渴欽渴不宣

向捧教蒼伏審旌旆已離闕近又切承到鎮視事茲始孟秋猶執
伏惟台候万福公即日蒙免官守所係詹詹岐恩館恨无羽翰切異
順時自愛以副中外共禱也

賀懇略具右幅此不屢陳明公忠義亮直終始一心初拜樞筦小
人尚敢微有間詞然識者固无異論今明公以議溫成策不合遽
遂請郡至於詰折之語人皆聞之於是賢不肖混然一辟无不歎
服况乎從游有素者其心如何也恨此官守不克一見而別後區
區惟千方愛重以慰天下之望

與孫元規大資貢五帖

韓魏公維圭

向聞行旆歸浙公方奔走朔塞仍歲荒歉事百出日夕區區以救
目前之急加以地遠不知寓止之的卒不暇致一字于左右少間動
息已為罪人暨承外除移疾得治便郡亦以多故不克道意然而
景仰之心更甚時昔游殿直至忽辱教翰益見篤舊之念併深
慙感迹日伏惟興寢百順明公忠正偉傑天下傾望雖中前稍失

調護豈當便樂閑放朝廷眷委必恐未能上副高志且夕大用以紆
賢蘊冀中外之蒙賜也未間更乞上為廟社以時加重不宣

雖相去阻遠久絕音問而景仰之心未嘗少忘也向日游殿直來
得教墨日欲修荅目前擾二又復過時惟深愧仄公非才守邊已
涉五年齷二无補僅能免過曲承愛獎益用慙服北道飢饉之後
凋敝至甚去秋方得一熟稍蘇疲瘵今年春夏亦復少雨邊事甚
寧肅伏恐知及胥會何日惟万万加愛不宣

自大旆至都雖院中一接儀采而以公府莫遂款對何勝邑邑數
次知不赴宴集伏惟寢味康適并門庭事悉有條理但河水侵疆
事尚未了煩公處置耳承陞辭非晚謹奉手啓上問惟冀自重
某不肖雖迹踈門下然欣慕明公才業忠義之盛實自先人与公
相知之年至於冲退之懷固不待見諭而後信也既蒙誨筆曲尽
意日无少隱者輒敢進說于左右伏緣朝廷填付重鎮遂煩舊德
以往公果不行誰當往者後來接此皆云省分而去謂朝廷何思

拙聞諸群議須至及言以報盛意伏乞裁擇不勝惶恐之至不宣
伏念阻遠門闌忽已四稔企向之懇日以增添深官私事叢戕牘牘
稀闊仰惟曠度未加謹片中春氣燠恭惟台候万福近伏審被恩
移鎮切謂即日引道以此未敢附啟修賀慮不得通徹不圖眷念
之厚忽貶鈞函公獲書且命過形謙謝之言鄙拙不文无以發明
德業之美但增恐懼之至未卜趨覲伏冀為國自重

與孫元規大資

歐陽永叔

急足自徐還辱書永以七月首途大旆遂西即日秋暑伏惟台候
万福昨日范公宅得書以埋銘見託哀苦中无心緒作文字然范
公之德之才豈易稱述至於辯讒謗訪判忠邪上不損朝廷事躬下
不避怨仇側目如此下筆抑又艱哉公生平孤拙何范公知獎最
深適此哀迷別无展力惟此文字是其職業當勉力為之更須諸
公共力商榷要須穩當承公許作行狀甚善便將請謚議官文
書有司據以為議大是一重公據早請揮筆只見行狀亦當牽率
為之也入對少留雁當西滿殘暑者千万保攝時乞惠問以慰孤
窮不宣

與蔡君謨

王陶 樂道

自河上拜別忽更時序多病奄奄踈奉書問每深企仰近叨恩命
承乏閩中闊踈之人何以塞責至此旬遽獲來教銜戢意愛匪言
克芥第尋繹餘矩庶有矜式凝寒方甚唯加慎寢鍊

謝王禹玉二帖

王荆公

不肖願趨走於先生長者之門久矣初以疵賤不能自通閣下親
屈執位之尊忘名德之可以加人而樂與之為善願公不肖私門
多故又奔走職事不得繼請左右及此蒙恩出守一州愈當遠去
門墻不聞論議之餘私心怏怏何可以處道途道遠延數月始至弊
邑以事之紛擾未得具啟以叙區區鄉往之意過蒙獎引遠賜詩
書言高旨遠足以為學者師法推褒進過分非先進大人所宜施
於後來之不肖豈所謂誘之欲其至於是乎雖然懼然不能以上

副也輒勉強所之以酬盛德之貺非敢言詩也惟恕其僭越幸甚
秋冷伏惟尊候動止方福未由前謝伏望為國自壽不宣

人以疵賤之身聞問願見非一日積頃以職事二年京師以求論
議之補蒙恩不吝知遇特深違離未久感戀殊甚然以私門多故
未嘗得進一書以謝左右伏蒙恩冷再賜手教推獎存恤其非後
進所當於先生大人之門至愧至恐何可以言也秋冷伏惟動止万
福惟為時自重以副四方瞻望之意

與張端明二帖

韓丞相子華

鄉嘗寓書郵中計徹鈴下牙校來止辱貶教尺意愛之厚溢于文
辭非情好篤密孰能至此愧佩嘉善言不可及日俟使還修答又
无消息必私去矣以是報札為緩諒垂恕察也暴寒大雪彼亦耳
否偃息優裕必惟射况康佳侍祠勞苦良可度知未卜時言馳想
曷既千方以時為國自重少副翹祝謹奉狀謝不宣

節序每煩貶教深有愧悚之懷適聆直使郵不敢復賀伏惟日來起
居万福承貺仁醞感戢奚勝公以守官无狀故求外補屢煩詔諭
未敢固請須俟少間當力引去也未遂談晤企仰實勞千方為國
自珍以慰祝望之懇

與馮當世三帖 參政

歐陽 永叔

伏自移鎮淝上當一奉書忽已逾歲續雖之馳問然詹企之勤則
未嘗懈也即日春寒未審尊候何似公以衰老无堪自解快天府
於今一暮正以唐史殘編為累今幸成書不久進御遂當南去世味
老來益有可厭者矣自當世治淝然大率諸相知皆云不得書公
亦地僻少有來使得詢動止朝廷公議與交親私望皆願還歸未
間向暖惟冀為國自重不宣

自承移鎮金陵踈疎奉問經暑切惟躰履多福江山之勝實足以
資清興而賢者又居于外豈朝廷之意哉朋友區區之私又可知
也公衰病迫於歸計唐史奏御遽陳厄艱而未蒙聽允進无所補
退不獲心負愧周行不知所自相見益未涯惟為時自愛以副詹

望不宣

自承移鎮合肥嘗一得奉狀其後區區附問更不再為涉暑以來尊候何似廬右淮南為劇郡切惟下車布治之初當少煩條教既而可樂之趣則有多於他邦也伏惟視政之暇為時自重玆俟來歸以慰士大夫朋友之望

與曾學士三帖

歐陽永叔

山郡僻寂習閑成懶凡於人事幾至廢絕前者迭起院文字人回特沐手教為別滋久伏承德履其休可勝慰澆公居此雖僻陋然奉親尸祿優幸至多愚拙之心本負報國招仇取禍執自當然裨補未有一分而緣公之故事紛然多端有損无益可為愧歎今而冒寵名飽食自便何以為顏也未有良會夏冷保重

近因人還得附拙記急足荐至又枉以書其為愧荷可勝道也兼審秋寒撰接之暇動履清福公去蔡咫尺以病足為梗少留于此忽復踰月昨晚勉向官所壽蔡相登時得拜問旅寓中草率為謝

與郭祥正太博四帖

王荆公

得手筆存問區區哀感所不可言示及詩編壯麗俊偉乃能至此良以歎駭也輒留巾甌永以為玩山邑少事不足以煩劇治想多暇日足以吟詠无緣一至左右惟自愛重以副向往之私幸甚不次罪逆餘生奄經時序咫尺无由自訴伏承存錄既以詩書不勝區區區哀感詩已傳聞兩篇餘皆所未見豪邁精絕固出於天才此非力學者所能逮也雖在哀夜把翫不能自休謹輒藏之巾甌永以為好也知道引事稍熟希為人慎疾自愛幸甚

承示新句但知歎愧子固之言未知所謂豈以謂足下天才卓越更當約以古詩之法乎哀荒未能劇論當俟異時耳聞有殤子之豐想能以理自釋情累也公罪逆荼毒奄忽時序諸非回訴无尽近承屈顏殊不得從容奉顏色處此為別豈勝區區愧恨乍遠千萬自愛承行李朝之當復來此諸須面訴乃悉許詩不惜多以景景副見借為幸

比承手筆尤劇欣慰時序感心不能自釋咫尺无由奉見鄉往尤深蒙許寄詩幸甚尚此留連不惜數賜教也冬寒自愛舍弟近出歲尽乃歸承書所以不得報也

與錢舍人

司馬温公

比日前聞君倚有滁州之命公是時已入四章求自黜若訟君倚以言獲罪不當如此之重乃是自為道地也以此不敢與君倚同謫而已至今尚未得請欲留則不得曉夕皇皇橫身无所仰視君倚如遷者輕舉計君倚亦不用此戚二也以著令不得躬往致餞

與丘殿丞

孫資政元規

奉別逾紀踈於附問企渴何言人至承惠字及著文足見智者用心之遠而思功及物也歎服才識故非一日矣公居憂三四年卧病自今春方有生意朝廷不知累被恩命切切辭免未能決去又此重任本差來江西湖南抚慰士民中途改往唐南衰病之質惟真章草瘡增舊疾不能保天年何暇賊為已三次上章求免未蒙允許必須至勤切祈于得請矣觀足下之支病者安敢承當他此事不免與余揚同其道矣少年时无病尚可驅策如今何為冬寒保愛草草上聞不宣

與張安道尚書

曾丞相明仲

拜違風儀三換歲律而又不上記盖无因而前惟乃心馳仰之勤耳中春氣和伏惟鎮抚多間尊候禔福數年均供應道氣增茂上方注意以待康濟尤願為時自愛不宣

與張安道尚書

蔡君謨

違去門闌之日滋久近得還都以舊疾未平加之人事故踈馳問詹跂風采不勝傾系氣候寒凜伏惟鎮抚藩圉神躰休泰公叨此計局通流之術本非所能超據要地第負兢悚日祈柄用以此末游區二下誠莫由敷叙不宣

與陶講書五帖

胡樞密武平

自抵治下私門多故重迫曹事曾中无奇親友書音俱成緬默日

者清馭臨貺鄙州喜見時髦甚乏主禮睽過之後聯獲二牘納之巾甌猶諸隋和英文粲然艱於裁送通慢之罪實因於此仁者尚恕應不相索於竿牘之間也早景已暄孝履何似惟願順納真粹慰其區區謹奉手啓述謝不宣

反臂相失歛然十旬既留家居密迹疆候相望文繹杳不可得宗人節推至首詞宴起且承襟味恬適得所貺手筆情辭周洽復尚謙挹奉戢來睠相期晏成未諧清集勉旃居易不宣

不敏无似向者承人之乏假守湖上足下不屑僻陋翻然賜臨樂與諸生傳經駕說相從文社弥年于茲此奉更書違去清集留亦時哲抵攬心曲去壘豆之日特勞訪別忽尔相失愴然久之便道過家煩暑移疾書牘並廢行李見過首蒙惠声遠尋前好情辭之厚奉戢敢忘會面未階求志无悶少需善價自愛良璞不宣

中間公息至特辱手筆郵問甚厚感戢无量素性鄙朴不便於書自在煩寃益以逋慢修谷良晚寓慙靡所竊惟講習无廢納養

貢部之情朝夕當報言念明哲臧器已久策取高第先鳴諸子在

此時也乃望乃望温繹之餘良重

近雪人至此嘗切詞動靜乃知有三衢之行介至辱書承已還孑舍竭來道路起居无恙兼聆堂上乃福歲貢之詔旦夕且下不唯賢者當疏高爵則據發素蘊進結明主在此行也君其努力不次

與張侍讀

宋諫議

外

自汲隄之別不数月亦抵罪於憂愧中誠不暇奉書訊以承下執事然每一望風无羽飛肉俄聞新復舊職改領巨藩犀舟泛江必已署政群論雖方大愜始得謗篋空而榮路關矣僕沾餘波亦張侍讀續得望望須代許歸人事倚伏相糾愚不能料不知今之人一賀耶吊耶吾弟之在遠偶耶不偶耶万事以身為本惟慎護寢味乃情之叩他懇臨紙不能及不宣

與吳學士

韓魏公雜圭

比以憂責至重殊少暇隙雖不能時具短幅以通記室之間而企

仰德誼唯日飢渴近郭固來特辱教筆且審興寢百順不勝慰刻
兼承去冬服藥多日尋慶康裕少便有失上問甚以為愧氣候微
煩更冀順時將重

與程修撰六帖

蔡君謨

回觀除日承有江西之行適奉手牘暫還姑蘇水行數日无緣接
盃酒通殷勤甚悵然也涉秋浮江景氣澄爽發人清思循行之外
吟詠為適仕宦豈尋常之所汨隨乃自如乃是了達也南都食物
可以奉親但胡公來緩當阻返流暑每甚道中多愛不宣

前日忽為別情悵茲甚比聞汴流尚阻行舟高懷豈不小興滯留
之歎耶送行詩卷暫借一觀方敢杼思也日夕為文字繁冗未果
再詣傾渴傾渴

蒙書知小疾未康更須攝護拙詩今附本通呈希賡屬為幸新造
法醞輒寄獻左右謾試看如何勝之但誇越之閑靜非錢塘可擬
若无病法蓬萊主人久兩稍霽清寒薄人願葆愛

蒙惠茶數品皆精奇滴會君倚庶子泉來輒嘗試之恨不同啜也
西湖寒食清明州人遊從眾為盛集數日為之達暮或聞鑑湖風
俗亦如此然越中舟舫鮮明殊為冠絕執事能為之出遊否衰年
強作少年事亦難勝矣

違別未幾復見歲適每懷辯論馳情南國承書副以佳菓珍荷鄉
得雙井四兩其時人還未試叙謝不悉尋身治之香色氣味皆極
精好是為茗芽之冠非日鑄寶雲云可比也雪寒省中頗增清興
端午氣候微熱想君執事安否殊慰傾素惠及卧龍珍茗猶在日
鑄之上頃年曾得日鑄其品甚高今之造茶者不及曩時卧龍前
无此等非精意不能至此也春三月湖上閑游時有篇什今錄數
首要知隆老尚管風物乎

與吳副樞

蔡君謨

違別台座令已累月瞻望之素不忘朝夕伏惟涉秋已來起居万
福公留邸中僅兩月今方東邁益遠声采惟冀視政之外順時自

重行歸大用以慰瞻望下情无任區區之至

謝張學士

王荆公

不肖學不得尽意於文章仕不得行其所學苦居切食動輒愧心而世之同好惡者已去少矣遇足下於此最為相尽義不得諱其不腆之文過蒙推舉非所望也朋友道喪為日久矣以人之不肖行於前而悔於後自已為多矣况足下之明耶每望教督而終未蒙推足下不遺以朋友之義見存不勝幸甚更數日遂東去千万自愛不勝思懷也

聖宋名賢五百家播芳大全文粹卷第五十三

聖宋名賢五百家播芳大全文粹卷第五十四

尺牘

與孟秘書三帖

王荆公

到郡忽忽欲一詣邑得奉見尚未果伏惟動止万福歲飢如此幸得賢令相與為治宜不至有失所者然聞富屋之藏尚有所潤而未發者切以謂方今之急閤下宜勉數日之勞躬往隱括而發之裁其價以予民損有餘以補不足天之道也悠悠之議恐不足卹在力行之而已不知鄙見果可行否希一報有以教幸甚幸甚自京師奉別於今已八九年事物之役无少休息時不得馳問但增勤企忽得書乃知尚滯下邑幸得會合歡慰亡量顧惟忝一日之雅而以公函見賜慙怍不知所謂也拜見在迹千万自愛幸以一日之雅而每辱以公礼見加非所望也蒙家諭具曉盛意奉監若行辭不難也至於閣下治行自為諸公所知不患无知已也惟以道自釋餘留尚究也蚕蠶之入今歲如何邑中幸得賢令仁

佐政治之所及切以為慰

辱手筆感慰跋涉溪山之遠亦勞矣然足以慰嚴邑元元之望惟寬中自愛也人來還急修答不謹幸見亮有不逮見教

與錢待制十九帖

蘇東坡

兩日不奉接思仰不可言既無緣往見空致手啓以為無益而煩還答故不復講日聞府中僚佐知小疾漸復常又得手教有作詩興甚慰喜也詩納去如蒙和何幸如之諸公詩無他本却乞封示旦夕朝會必遂款話不一

朝會踈闊遂不獲際見企渴可量歲律就尽殊無以為樂甚惘也此日起居何如中前云今日當見過若果耳人回略諭當不出也或未暇亦不敢固屈匆二不宣

兩日不果詣見傾仰不可言乍涼台候勝常承已拜命正得所欲想愜雅懷但朋友懷公之去不能無惘二然似聞明主知照極深其也思不復計較也明日後日皆休務可以往謁而魏邸將出不可遠去過此雖非假日亦可以因訪僧郊外得邂逅也想公行李亦不即辦當少留耶冗中奉啓不一

會稽半日欲之豈易得哉小生奉羨之意殆不可言然亦行當繼公也舍弟差闕下試官不及奉啓計其出公未行也餘非面莫及倩仲蒙仲昆仲不克一別意甚不足侍奉外千万珍愛蒙仲更礪賦筆遂取魁甲至望旦夕入文字乞郡江湖之東行亦得之但恨會稽為君家所奪耳呵呵

令子至出荅教感慰良極乍冷且喜台候康勝此行知適所願但有一事當在意者梅月宜頗居高燥郡中常所偃息處皆宜易新甃也餘具令子口白公意在公流揚楚不可得潭洪亦所樂也川公服一段茶兩團酒一壺蜀紙三百幅聊將區區恕其浼瀆子由試院來日出或能一見子容諸公欲二十日出錢公已出城莫須少留否

別後書問簡廢到官百冗未皇上狀先枉教墨得聞比日起居住

勝感慰兼集聞坐嘯竟日予與公緝豆可屈在滕薛而衰病坐苦煩劇當易地而後安又大官司徒皆闕人當令公厭事矣大熱不可出初到略須鋤治紛紛湖山咫尺尚未見也思企談笑起望西與藹藹若聞聲言效尚真珍衛少慰區區不宣

路中見二郎甚安渠道過瓜洲復來相見江口恨不欵曲然亦被捉住寫數紙東來絕不作詩公必當作何不寄示聞公今年造茶奇甚願分絕品少許子由遂作北扉甚不皇方詞免也兩小兒迨過在此邁此月當替非久亦此來承問及感四郎及諸季各安未及書也

久不奉書忽辱教字并次公具道盛意併增感怍比日起居住勝兩邦相望衰拙自知常有絕塵之歎惟腰脚踳踳略不相讓可以一笑也近亦漸平復惟用溫補藥頗覺宜人聞公每用朴消大黃晝夜洞下乃愈此豈衛生之計哉願於不發時常進一溫平藥令不發為佳然已發想亦非下不愈也無由面尽臨紙悵悵

專人來辱書且謂比日起居清勝知暫在苦想无苦恙聊欲閉閣宜率耳求紫雪納五兩去尚有數兩不欲多馳去中年豈宜數進此藥乎相望雖咫尺所欲言者非筆舌可究特登中和東廡望西與屋瓦可數相思何窮子由本欲請外覲得公處今又北扉此冊謬悠矣公簡上心豈能久外耶餘熱千方為國自重不宣

日望來音此懷可知歲暮寒慘起居何似師簡既失必降劄子歲前可得迎見否未間伏惟為國自重穴中不一

公在杭雖少勞而意思自得此來極安逸然多憂愧想識此心也只在興國浴室獨居大暑中殊清也蒙仲在公翊所見之公翊今得符離不知當同往否承辟召小兒感戴不可言得否猶未可知也浙西水災殊甚已差麥場二君朝論甚留意救卹也知之邊上秋熟可慶可慶

數日不接奉賜仰之至苦寒起居佳勝欲見近歲天下戶口數告為錄示早得為佳不知幾日與穎叔仲至見臨匆不宣

又別傾企辱書見知舟御在此起居佳勝甚欲少留以須一見而舟人以潮平風正當速過遂且渡承諭當復來會且當里煩從者勿二不宣

尊丈台候計安聞甚樂會疑積不知有書見賜否么又上

輕大江重相別誰如君者此意豈可忘耶然迫夜涉險悔不堅留君一宿也二軸謾寫數字付來乍遠千万保愛不一

前日作米元章山研銘此研甚奇得之於湖口石鐘山之側有盜不御塚奇發現攘于彭蠡斷鐘取追有米楚狂即盜之隱因山作研其理如雲過楊且伸意元章求此研一觀也

與文玉十一帖

蘇東坡

榜下一別遂至今矣辱書感歎且喜尊躰佳勝到岸即上謁可假數卒不吝餘當回旣不宣

昨辱教不即答悚息悚息經宿尊躰佳勝見召敢不如命然瘡痂大作殆難久坐告作一肉飯竟日移舟池口矣山婦更煩致名劑感戴不可言謹奉啓布謝不宣

久留治下以道舊爲樂而煩亂爲愧數日尊躰如何漕車即至不少勞乎永日如年念公盛德不去心所要作字爲瘡腫大作坐卧楚痛容前路續寄也不罪不罪鄭令清苦无援非公誰復成就之某造次造次瘡病无聊不尽意惟万万以時自重

昨辱惠書伏承別後起居佳勝么到金陵瘡毒不解今日服下劑藥羸乏殊甚又不敢久留來人極愧草略餘熱万万爲時自重書已領跋屏前去極不妨然何足取也愧二通判大夫甚欲寫一書乏力不果乞道區二

去歲人還奉狀必達尔後行役无定遂闕馳問比日不審起處何如么忝命過優非許予之素何以及此无緣面謝重增反側酷暑更祈順時爲國自重謹奉手啓不宣

寓白沙須接人而行會合未可期臨書悵二見張公翊出清溪圖甚往謝生殊可賞想亦由公指示也曾與公翊作清溪詞熟甚文

多未暇錄去後信寄呈也春達化去極可哀雖末路踴躍使人耿耿然求此才韻豈易得哉重會果遂成茂草言之辛酸後事想公必一一照管也匆匆揮汗不復及意耳

欠迫久不上問辱教承起居住勝感慰兼集違去忽兩歲思仰不忘每惟高才令望尚滯江湖豈勝悵惘不肖忝冒過分重承牋教禮當占詞布謝數日以病在告使者告回甚速故未暇也不罪不罪酷暑方熾千萬為時自重

伏蒙賜教恩勤曲折有骨肉之愛蒙世不比數何以奉承此歡懷藏愧感大不可言累日聒三溷煩仰荷眷與不見瑕疵又飲食之及其行餉酒分醯蒙被无已之惠益多愧耳謹奉狀稱謝春寒伏冀調護眠食以須寵光

道出貴郡廼獲淹觀風度實慰從來伏蒙大雅開接甚厚小人何以得此薄晚奉被賜教存問幸甚拙於謀生至煩地主餉米感愧匆匆拜謝不宣

經宿伏惟尊候万福比欲奉承勤款教諭屬以風靜江平伯氏堅約來日解舟不審能曲聽否得指搗今日得券給米來且得護兵聽行以慰伯氏之意何幸如之謹咨皇左右皇恐皇恐

昨晚風靜遂解舟泊清溪口道遠不能入城觀隨車歌舞之盛徒對月舉酒想見風度耳經宿不審尊候何如伏惟万福未申間泊銅官古縣蕭索尤思仰緒論謹奉狀承動靜率易皇恐

與馮叅政四帖

歐陽永叔

自成書請外所陳哀切冀以危誠有以感動而二三公過為顧慮曲以見留在意實厚於計則非便也奈何奈何本欲為郡下客少溷主人復未可得然使少遷延終當必償夙志也濟叔窮居得當世在鎮必以慰意不久當應稍起此公議久所冀贊詩也前承惠碑多佳者甚濟編錄感幸感幸聞金陵有數廳梁陳碑及蔣山題名甚多幸為境內所有博採以為惠實寡陋之益也病暑直率

區區文闕致問中間辱書為感何已冬寒伏惟台候万福公以衰

病思得一小郡養拙三二年間謀一歸老之地此願未獲遽被責以吏事精力耗竭何止勉強不出歲末春初當江西之行矣薛親幹敏河東風土民間事緒可以詢問得佐幕府甚幸甚幸公以目疾為梗臨紙草率誰與鎮撫外以時為國自重

承惠寄碑刻既博而精多所未見竄陋蒙益而私藏頓富矣中年早衰世好漸薄獨於茲物厥嗜尤篤而俗尚乖殊每患不獲同好凡如所惠僅得三二固已為難而驟如是之多宜其如何為喜幸也濟叔公議猶屈乃吾徒之責未嘗忘于懷而造物者第與眾人同為嗟嘆而已豈賢人君子事否有命殆非人力能致耶雖然敢不竭方辱諭感愧承專遣人至數名問其還期每去有故未歸遂且於郵中附此俟渠行別當奉狀也

昨自罷頌劇卜居城西少獲休息然猶此盤桓未遂決去正以唐史將遂終篇然亦不過秋末時事耳廬去京師不遠計可備聞難於紙筆具道也當世據名藩優游之吏自足為樂其餘一付公議但朝多賢士而獨在外與相知之私立欲公來歸之速耳公衰病俱故去心甚速諸公察其寔然而未肯决然放去奈何奈何原父雖歸子華作憲朋從益蕭索當世尚壯及時讀書行樂此外稍隙時當得數奉問大執事與自重

與李龍圖

文潞公

公啟孫女子奉事高門舉家慶幸然以幼稚未閑札則莫棄慈此李郎以去試有期欲且留京宅隸習兼聞已得訓旨許之甚其餘必李郎書中具道茲不云云

與錢穆父待制七帖

蘇東坡

遠接人未到闕書吏止用手狀達誠而已亦幸仁明不深責也久留吳越謠頌藹然想不日召還密近幸益為民自愛迫行冗甚不

盡區區到官別上問也

親情柳子立秀才寓居為部或去相見略望與進幸甚

辱簡承起居佳勝示諭容面自正苦暑不能坐近夜稍涼訪及為

幸不一

奉書不數然日聞動止以慰飢渴比來台候勝常秋高諸况必佳
太閑逸否公五鼓輒起平明亦无事粗得永日嘯詠之樂今日重九
一樽遠相屬而已新詩必多幸寄示乍冷千萬為國自重不宣
兩日不接奉思仰不可言兩冷起居住安昨日小詩與通叔為戲
重煩屬和感服可量來日无會可於何處相聚退之所謂此日足
可惜願未遽相別也不一

漕任雖非眾望然有一事有望於公浙西流殍之憂來年秋熟乃
免日月尚遠恐來年春夏間可憂賑之則无還貸之則難索皆官
力所不逮惟多擘畫使數郡糶場不絕則公私皆蒙利事甚易知
但才不迨且无是心敢以累公况粉榆所在當留念也

今日早不免謁告今已頗安來晨幸同賴至二公臨訪早至為佳
不能遍致簡恐煩回荅只告穆父轉呈也

經宿台候万福十日之約却為昨晚奉勅旬休致齋翌日定光行
事須至退日慙棟不已一會何微末而艱故如此乃知永叔嘗非辭
之句真非虛語公轉呈賴至二公此簡芭蕉之謂不能逃也可呵

與張安道尚書二帖

蘇東坡

雪後苦寒遠想燕居恬適台候勝常公以獨負冗迫久缺上問計
蒙矜愍歲律行尽展奉何時尚冀順時保頤益永眉壽下情禱頌
之至不宣

公以不善俯仰屢致紛二想已聞其詳近者凡四請郡杜門待命
幾二十日文母英聖深照情偽德音琅然中外脊服幾至有所行
遣而諸公亦和之數日有旨公與言者數君皆促就職明日皆當
見盖不敢堅卧謙若有辨曲直者然衰病孤拙度不能久此恐不
遠當復前懇耳蒙知眷之深不敢不尽幸為密之禰急多忤有
愧教誨

與王副樞

文潞公

遠承惠書深諒勤厚感刻感刻復道園宅春物甚盛東床居之頗

遂安逸光化想已赴官披見未期切希以時自厚

與尹師魯

歐陽永叔

兩路地壤相接幸時文字往還然缺附狀蓋畫星責以錢穀強其所不能自然公私不濟况其素懶於作書也然時聞師魯動止蘇子美事深欲論叙但尚猶豫聞有極言乃知自信為是甚善甚善子美雖未極復有如排沮群議其益不少晉潞師魯少所樂遊其况如何春寒千万保重

與劉原之大夫二帖

蘇子由

北歸至許已半年餘但未嘗作都下相知書故音問缺然想不訝也近承惠教具審起居如宜奉別之文企仰何勝千万順時珍重區區不宣

先公深有謙德不欲請謚自是高節朝廷不忘舊德文行典禮亦是美事君目各伸其意兩不相妨至於厚之內承先訓不敢陳乞固有君命不敢隱藏行狀進退合禮更无可疑若考功再有命宜即錄與也况太常博士宋景年考功高士英皆佳士銳意撰述幸勿疑耳宋高二君皆當執筆者恐悉

與秦祕校二帖

蘇子由

昨日辱迂步追晚不果從容良以愧感新詩益清麗可愛不肖者何足以當之欽佩欽佩天寒欲雪為况佳否

前日不果從容承誨示重感悚也新詩飄然益見高興但不肖者頗愧虛辱耳何時能再枉教度更卜清論也傾企傾企

與孫學士

韓持國

昔者大旆過都公以典護深客不獲略奉言論逮至已事之日又值夙駕首途欣慕之誠莫伸乃一指悒悒亦豈勝鄙懷敢意下車之初先蒙貶教為貶在謙德雖至而使罪戾益深愧懼叢併未易殫叙新秋餘暑伏異為國自重少慰翹祝之想

與李舍人

韓持國

老拙多病人事都廢乃蒙不遺猥枉書誨佩服故人厚意何可勝

言伏惟即日動履清安修謝後時諒蒙恕察春暮兩寒尤希頂
疾愛重

與范堯夫舍人

韓 持國

父別未嘗不思仰忽承有官臺之請冀望車騎得還里中日夕相
見之西洛不復悵然春氣暴暄躰候何如堯夫高才達識賢士
士大夫望君進在朝廷以申遠業而又屈閑官徒增歎息耳未由
款接千望自愛

前問已悉堯夫高遠已有所見失子之悲无可奈何當勿久留于
曾中人生如幻自是吾身朝暮不測餘曷足道耶入洛見諸公當
可開釋方事閑適惟保護為善

與丘道源寺丞十帖

祖 擇之

去冬暫到闕下雖略獲展晤然以人事紛紛不果面別可量惰拙
耳近承有黜歎之役事出意外令人驚歎不已忽辱手教乃知并
草率勒此伸謝諸留面究

繼日猥冗未繇上謁累蒙簡誨荷德良厚秋氣頓爽起居佳裕觀
潮之會傾俟臨况幸无見拒謹具手啓以代面叩

累日人事紛二无少暇遂踈問起居其詹嚮之心旦夕以之也介
至得手教承履尚清勝慰抃良深所須舟如嚴旨遣去陸裝書亦
聞命矣京醞一壺納上希檢到勿訝輕浼忽忽奉啓不謹

昨日晨寸手華未皇裁謝人來又沐教况无任感愧之至經宿伏喜
起居佳裕來晨欲奉邀車騎就祥符寺早膳傾佇屈顧也寵惠實明
先生傳不勝感著

信宿伏想起居均適陸款書二通謹令納上介亭之會卜日咨聞
次傾渴傾渴

近日繼有使客雲集良苦於將迎也職此又不果往見長者詹企
之素可勝道哉兩寒起居佳否適有客見遺糟蟹輒敢分獻以
佐案杯望賜檢納且夕稍暇即躬造門宇次

早來改朔不果候謁人至特沐手誨竊喜起居清勝卑軀瘡瘍所苦如昨曲煩憂郵至感至感所惠藥不住服食次世冗草二上日以賤事羈束无緣一往少奉長者餘論可量邑二耳雨寒伏喜起居住裕稍暇當卜候謁人次臨紙不尽所懷明哲亮之而已連日冗迫遂踈上謁前辱簡誨不獲裁謝當情恕之也雨寒射中佳否收得貂鼠褥一領輒敢馳獻以將下誠望賜檢納容易早來辱示手教伏承齋舸出次外聞乍遠風度豈勝依二屬以賤事所嬰不獲躬詣江浹叙別可量惟邑耳春寒途中千刀珍重兩日前湖上幸獲款奉自尔以冗迫更踈占對豈勝詹嚮之素伏承教况仍示佳什感仰不已也如聞玉軀小有違豫應請藥喜矣未皇再造舟次姑勒此少布謝万一秋暑惟冀寬中自愛

與王定因十九帖

蘇東坡

自到黃州即屬岸人日伺舟寓消耗忽領手教頓解憂懸仍審比日躰氣清強且能自適至慰知未決東西路計其迂直嶮易想去

必不甚懸絕而得一見乃是不肖大幸不識果安從公寓一僧舍隨僧蔬食甚白幸也感恩念答之外灰心杜口不曾看謁人所之出入蓋時往村寺沐浴及尋溪傍谷釣魚採樂聊以自娛耳罪大責輕得此亦甚幸未嘗戚二但知識數十人緣我得罪而定國為軾所累尤深流落荒服親愛隔闊每念至此竟心肺便有湯火芒刺今得奉教既不見奔絕而能以道自遣无絲髮芥蒂然後知定國為可人而不肖他日猶得以衰顏白髮廁賓客之末也甚幸甚幸恐從者不由此過故專追人致區區推願定國深自愛重仍以戒我者自戒而已臨書悒悒二不知此人到江猶及見仙舟否匆匆不宣

揚州待其太保者官於瘴地十餘年北歸面色紅潤无一點瘴氣只是用指脚心法耳此法定國自已行之矣請加工不廢每日飲少酒譟節飲食常令胃氣壯健安道軟朱砂公在湖州服數兩其文竟有益到彼可久服子由昨來陳相別面色殊清潤目光炯然夜

中行氣膈腹間隆二如雷聲其所行持亦吾輩所常論者但此君有志節能力行耳粉白黛綠者但是火宅中狐狸射干之流願深以道眼看破此外又有一事須少儉嗇勿輕用錢物一是遠地恐万一闕乏不繼二是災難中節用自貶亦消厄長福之一端所懷千万不尽一二也

今迹中領手教知到官无恙自處泰然頓解憂懸又知攝二千石風采震於殊俗一段奇事也公羈寓粗遣但八月中喪一老乳母子由到筠亦拋却一女子年十二矣悼然未衰復聞堂兄中舍卒於成都異鄉罹此觸自按感奈何近頗知養生亦自充薄有所得見者皆言道兒與往日殊別更相關數年索我閱風之上矣兼畫得寒材墨竹已入神品行草尤工只是詩筆退也不知何故張公比得書无恙但以厚之婦家事无人頗牢落子由在筠甚苦局事煩碎深羨老兄之安逸也非久冬至已借得天慶道堂三間燕坐其中謝客四十九日雖不能如張公之不能語亦常闔戶反視

想當有深益處也定国所寄臨江軍書久已收得一書及復議論所處憂患者甚詳既已自解又洗我昏蒙所得不少也然所謂非苟知之亦允蹈之者願公常誦此語也杜子美困窮之中一飲一食未嘗忘君詩人以來一人而已今見定国每有書皆有感恩念答之語甚得詩人之本意僕雖不肖亦嘗庶幾彷彿於此也文字與詩皆不復作近為喪老乳母作一誌公又求公書輒書此奉去今日馬鋪李孝基送君謨石刻一卷其末後有定国題其字又動我相思之懷作惡久之數日前發勾沈遠過此亦云與定国孰船中會語半夜強半是說定国近有人惠大丹砂少許光彩甚奇固不敢服然其人教以養火觀其变化聊以恬神遣日賓州去挂不甚遠朱砂若易致或為致數兩因寄示稍難即罷非急用也窮荒之中恐有奇士當以冷眼陰求之大抵道士非金丹不能解化而丹材多出南荒故葛稚川乞岫嶺令竟化於廣州不可不留意也陳璞一月前直往筠州看子由亦粗傳要妙云非父當來此人不可

惟有道術其與人有情義久要不忘如此自亦可重道術多方難得其要然以公觀之惟能靜心閉目以漸習之但閉得百十息為益甚大尋常靜夜以脈候二三十息迺是百二三十息尔數為之似文竟有功幸信此語使真氣雲行躰中瘴冷安能近人也知彼有殺賣鵝鴨甚便此間無有但買斫肉魚及猪羊麀草鴈亦足矣廩入雖不繼痛自節檢每日限用百五十自月朔取錢四千五百足繫作二十塊子掛屋梁上平明以畫杈子挑取一塊即藏去杈子又以大竹筒別貯用不尽者可謂至儉然猶每日一肉盖此間物賤故也囊中所有可支一歲以上至時相度日下未須慮也兒子正如所料不肯出官尋以公言諭之亦肯去來春令赴銓斬黃間一官非復小補也信筆亂書无復倫次不覓累幅書至此恰二鼓書室之前霜月滿空想識我此懷也言不可忽惟万万保晉而已桂砂如不難得致十餘兩尤佳如費力一兩不須致也如聞晉卿已召還都月給百千其女泣訴聖主為惻然也恐要知來詩愈奇深欲和又不欲頰二破戒自到此唯以書史為樂比從仕廢字時少免荒唐也近於左側得荒地數十畝買牛一具躬耕其中今歲早米貴甚近日方得兩日夜墾闢欲種麥雖勞苦却亦有味鄰曲相逢欣欣欲自號麀糟陂裏陶靖節如何君數書筆法漸逼晉人吾筆法亦少進耶畫不能皆好醉後畫得二十紙中時有一紙可觀然多為人持去於君豈復有愛但卒急畫不成也今後當有醉筆嘉者聚之以須的信即寄去也耕田詩中有公家童燒枯草走報門并出一飽未敢期瓢飲已可必又有去刮毛龜背上何日得成甃此句可以發万里之笑也故以此填空紙

今日景繁到泗州轉示十月二十二日所惠書并新詩六首妙曲一首大慰所懷河凍膠舟咫尺千里意思牢落可知得此佳作終日喜快滯蕙冰解幸甚幸甚公在揚州入一文字乞常州住得耗奏郵拘微文又不肯投進已別作一狀遣人入京投下近在常州買得一莊子歲可得百餘石似可足食非不知揚州之美窮猿投林不

暇擇木也

久不奉狀辱書感慰之至比日起居何如謗焰已熄端居委命甚喜其喜然云百念灰滅万事懶作則亦過矣丈夫功名在晚節者甚多定國愧古人哉公未嘗求事但事入手即不以小大爲之在所施亦何足但无所愧而已蒙示諭慙汗若使定國居此所爲當便驚人亦豈特止此而已本州職官重華密人也能具道公政事歎服不已但公命未通耳但靜以待之勿令中途齟齬事自然獲濟如國手不須大段用意落局便須羸也未由會面千万保重不宣領書所以教諭之者備矣感佩之意非書可及謹當遵用然所云領發謝章不待到任私意不欲尔也謝章有過无功而礼不可闕到任一章足矣空言不足上報万一徒爲紛二耳諸公啓事自到後一發亦備數而已謫居六年无一日不樂今復促令作郡坐生百憂正如農夫小人日耕百畝負擔百斤初无難色一日坐之堂上與相履饗食便是一瓦公之意可復勸令周旋委曲以求佳早子由赴

闕之命亦是虛傳耳

別來紛二末即奉狀兩辱手教感愧深矣且審比來起居住勝爲慰公矣郡去國士友所歎然自是計少安矣其他无足言者公已得賴州極慰所欲但不副張公之意盖旬日前得子開書極來相禱方安於彼不欲移動故不敢乞也聞張公已安慶慰无量合會未可期唯千万保齊不宣

平生欲著一書少自表見來世因循未成兩兒子皆粗有文章材性未暇督教之從來頗識長年養生妙理亦未下手三者皆大事今得汝陰陽无事或可法成定國必賀我也言此者亦欲公從事於此耳書至此心中欣躍如有所得平生相知不敢獨饗當領此意勿復念餘事也

辱書具審起居佳勝誣罔已辨有識稍慰寵二詩讀之從其然醉翁有言窮者後天公身將達而益工何也莫是作此數語而以饑窮鬼耶喜而不寐詩甚欲和又礙親嫌皆大可笑也張公今見微衰

然論古人益明不惟識慮過人定國亦可見笑人事紛一書不盡言
非面莫究

別來三辱書勞問之厚復過時昔矣衰謬日退而公相好日加所
未諭也又中間一書引物連類如見當世大賢意謂是封題之誤
必非見與者而其後姓字則我也尤所不論然三復其文詞韻甚
美正似蘇州何充畫真雖不似而筆工之精未可弃也謹當收藏
以俟稱此者而說與之如何公行復有差遣亦必粗如息可喜可
喜但此去不知會合何日不能无耿耿也真贊輒作得數句如可
用即令一善寫小字入代書紙上可也張公集引厚之字說皆未
作別後紛二可厭可厭神明喜方納上餘万万自愛不一

公向要作滕達道埋銘已諾之其家作行狀送至此矣又欲作孫
公神道碑皆不可違只告密之勿令人知是公作仍勿令以潤筆
見惠乃敢聞命也來詩甚奇真得充替氣力也呵二後詩未及知
胡夕別遣人并致糟淮白所欲宜與田公豈復有愛於此等然此
田見為元主昏賴公見有文字在浙漕處理會未見了當亦當申
都省也田在深山中去市七十里但便於親情蔣君勾當耳不知
異時蔣君能復如此幹否更請筆壽之

先帝升遐天下所共哀慕而不肖與蒙恩尤深固且作挽詞少陳
万一然有所不敢者耳必深悉此意无狀坐廢衆欲致之死而先
帝獨怜之而今而後誰復出我於溝瀆者已矣歸耕沒齒而已矣
凡百粗遣土風食物官府事躄遠不及南都西湖亦虛名亦不足
道唯一味閑極可樂也公幣皆用過延客一飯而已歌者未嘗見
亦不足見也呵二會合未可期千方以時自愛

辱書最驚聞樂全先生薨背悲慟不已元老凋喪文萃世所痛豈獨
門下義舊雖壽祿如此而吾儕不復見此師範奈何奈何方欲乞
移南都往見之今復何及尚賴定因在彼差慰其臨沒之意聞屬
續之際猶及公與舍弟痛哉仰惟寬懷且助厚之迷中幹後事也
執筆搶塞不次

專人來辱書且審起居佳勝張公行狀讀之感慨內有數處須至
商量籤帖持去之細與批鑿附來高文固佳妙无可指摘但其間
不免有愚意未安者必是老謬不足曉煩公開諭仍不深訝蓋張
公文志又不可不尽心同慮也惶悚惶悚仍須索使下筆也未由
彥早方加愛不一

不見定国一年不與定国書半年每得來書輒愧蒲面取紙欲答
又懶而止每想君熟知我此態不復以為怪也即日起居何如知
受任安肅朝堂既未能置君於所宜獨无一稍佳處乎料亦都不
計較許時見過之語似稍的今歲必不失望矣河水既不至此間
諸事稍可樂幸早臨僕秋中當再乞南中一郡耳屢蒙寄詩老筆

日可畏殆難陪奉字法亦然真日當配古人矣酷熱方二自重
有一事拜託杭人欲開葑田蓋五十六年矣但有志於民者无不
經營亦有數公下手開鑿終於不成推不肖偶得其要開之月餘
有必成之勢吏民歡快如日去醫近奏乞度牒五十道終成之一

奏狀一申三省皆詳不利害告公為一見莘老痛致此意仍求此
二狀一觀之近奏事多蒙開允想必莘老之力更乞應副此一事
使西湖一旦盡復有唐之舊際山為界公他日出守此邦亦享其
樂切望痛與留意近說與子由令為老兄力言而此人懶慢謬悠
恐不尽力故以託定国彼此非為身事力言何嫌也

么一味絕孝无憂歸根守一乃至无一可守此外皆是幻此道勿
謂渺漫信能如此日有所得更做没用處亦須作地行仙但屈滯
從狗竇中過耳勿說与人但欲老弟知其略耳問所欲幹實无可上
煩者必欲寄信只多寄好乾東東人參為望如无的便亦不須差人
豈可以口腹万里勞人哉所去作書自辨者亦未敢便致耳不怨
天不尤人下孝而上達知我者其天平張十七絕不聞消耗進矣
仍存性否懷仰樂全之舊德故其箴之否

聖宋名賢五百家播芳大全文粹卷五十四